

Изглядовательный центр карпатістики

Андрей Бродій

ШПЕКУЛАНТЫ

Комедія на 1 дію

Факсімільне видання

Позадслово В. Падяка, к. ф. н.



Ужгород
Видавельство В. Падяка
2019

УДК821.161.25(477.87)-22
Б88

Бродій, Андрей.

Шпекулянты : комедія на 1 дію [Текст] / А. Бродій ; Изглядовательный центр карпатістики; післямова В. Падыка ; серію веде В. Падык. – Факс. вид. за : Бродій А. И. Спекулянт

ы : комедія въ одномъ дѣйствіи. – Ужгородъ : Книгопечатня Юлія Фелдешія, 1932. – Ужгород : Выдавательство Валерія Падыка, 2019. – 72 с. – (Русинське факсіміле. Книга четверта). – Текст русин. мовою.

Серію веде
Валерій Падык, к. ф. н.

Учебный текст про студентів русинських одділень
універзітетів Европейської Унії

Изглядовательный центр карпатістики щиро вдячний
проф. П.Р. Магочію (Торонто) за поміч у застаченю оригінала
песы «Шпекулань» про факсімілне видання

© Видавництво В. Падыка, 2019
© В. Падык, післямова, 2019

ISBN 978-966-387-120-2



СПЕКУЛЯНТЫ.

КОМЕДІЯ ВЪ ОДНОМЪ ДѢЙСТВІИ.

На одномъ изъ карпаторусскихъ нарѣчій написалъ:
АНДРЕЙ И. БРОДІЙ.



УЖГОРОДЪ.
КНИГОПЕЧАТНЯ ЮЛІЯ ФЕЛДЕШІЯ
1932.

Андрей Бродій и «Шпекулянты»:

вінець на могилу зоркого наблюдателя
національного развивання
підкарпатських русинів

Творення по Первій світовій війні на руинах Австро-Угорської імперії нової славянської держави – Чехословачії – возбудило славянський елемент у державі, викликало економічні, соціально-політичні, але и важні культурні зміни. Так державотворчі процеси, як обчехована Підкарпатська автономія у ЧСР (*офіціально*: Підкарпатська Русь, по чеськы: Podkarpatsko), ци, фактично, боротьба за заведення автономії викликали у підкарпатських русинів небывалый до теперь рост національного самоосмыслення, соціальної активності, політичної культури и еманципації села. Ушиткі тоты здвигы, ясної діло, не могли ся не позначити, и то позитивно, на культурнім и літературнім двиганю регіона. Иде за бурный розвой карпаторусинської культури и літератури.

Сесе був унікатний результат творчого и культурного вознесеня підкарпаторусинського народа! Ипно за тото уповів Євгеній Недзелський – была то епоха «повоєнного вдухновеня»¹. (Сесь період знаєме называти тыж епохов Другого карпаторусинського

¹ НЕДЗЬБЛЬСКИЙ Е. Угро-русский театр. – Ужгородъ, 1941. – С. 47.

культурно-національного відродження). О тім часі мож повісти, же був то, як пише сочасна америцька теоретичка літературы Елайн Русинко, період Еманціпації русинської літературы².

Ищи май конкретно за здобыткы и проблемы театралных змагань уповів Павло Алексеев – російський емігрант и бывший актер Московського Умелецького театра (рос.: Московського Художественного театра; МХТ, дале МХАТ), часть актерів котрого (так называна «пражська» група) пішла до Европы на гостіваня, айбо домів до Росії (по році 1921) уж ся не вернула. П. Алексеев тримав себе в еміграції на Підкарпатській Русі за ученика именитого російського театралного реформатора Константина Станіславського³ – основателя МХАТ.

П. Алексеев – сесь «вічний» дочасный режісер карпаторусинських професіональных театрів – у свому приручнику про театралні кружки Підкарпатя у 1937 році писав: «Помеже населеня Підкарпатської Русі наблидає ся гет великий інтерес до театралных представ. Не лем по варошах, айбо тыж скоро у кождому великому селі суть театралні кружки. Кождорочно иградут стовкы представ. За режісерів їм служат переважно учителі містных школ. Благородну приклонность до театра – сесь вірный знак живых духовных потреб – из культурного бока мож лем вітати. Айбо на Підкарпатській Русі ищи ся не розвила истинна театрална культура. Хыблят туй добрі ошколовані

² RUSINKO E. *Straddling Borders: Literature and Identity in Subcarpathian Rus'*. – Toronto – Buffalo – London, 2003.

³ «Станіславський» – то псевдонім; исправдішне прозвище К. Станіславського – Алексеев. Годно быти, же П. Алексеев приходив ся К. Алексееву (Станіславському) даякым родаком.

театралні керівники. Не суть тиж приручники из вопросів театралного уміства. А межы тым, жертвна робота режисерів и любителів, помеже котрі набізувно суть таланты, потребуе правильных умелецьких основ. Завто взяв им на ся задачу курто и доступно выкласти елементарні основы театралной творчости. При составеню «Основ театрального творчества» я ся бізовав, главно, на школу Станіславського, основателя Московського Умелецького театра»⁴.

Місна драматургія и карпаторусинський національний театр стали зримов доміантов літературного двиганя часу меживойня. Розвой других жанрів, як то поезія и проза, ани ся не даст порівнати из здобытками містной драматургії. По підкарпаторусинських селах (котрі днесь суть частів України, а тиж Словакїї) театралну культуру репрезентовали, як ся угадуе, скоро 550 театралных кружків, авадь аматерських театрів. Місне театралне двиганя оживило драматургію. Выдтак місні драматики про потреби театралів написали и выдали веце як 120 (!) пес. До того, скоро четири десяткы театралных штук обстали у рукописах⁵. Ліпші из тых пес у 1934–1944 роках пак играли в Ужгороді на сцені професіональных театрів – Земського Підкарпаторуського народного театра

⁴ АЛЕКСѢВЪ П. Н. Основы театрального творчества: Краткое руководство для театральных кружков, начинающих режиссеров и актеров. – Ужгород: Школьная Помощь, 1937. – 48 с.

⁵ Повну бібліографію пес підкарпаторусинської драматургії часу меживойня умістили сьме у монографічному видані; *позирай*: ПАДЯК В. Історія карпаторусинського національного театра и драматургії: Высокошкольський учебник. – Пряшів: Выдавательство Пряшівського універсітета, 2018. – С. 327-340.

(у старів орфографії: «Земській Пôдкарпаторусській народный театр», 1936–1938) и ёго предходників – драматичных курсів-школ, а дале (уж по анексії території Чехословакиї) – у театрах-наступниках, як то Угро-руський національный театр («Угро-руській національный театр», 1939–1942) ци Руський народный театр («Руський народный театр», 1942–1944).

Были то пьсы: «Уйко изъ Америки» (опублікована у 1922 р.), «Кандидатъ» (1923), «Нѣмая невѣста» (1926), «Верховинская кровь» (1930) – ушиткі од Антонія Бобулського, «На Верховинѣ» (1925?) од Бориса Єфремова, «Маруся» (1930) од Сіона Сілвая, «Сирота» од Ирины Кейпазы (1933), «Радости майстра Фулярдіно» (играли подля рукописа) од Ирины Невицькой, «Буря надъ хатою» (1937) од Еміліана Калабішки, «Бородате непорозумѣня» (1938) од Александра Сливкы, «Овчарь» (1940) од Михайла Лугоша и Владимира Грабаря и др.⁶

На зачатку 1930-х років спровбовав свій талант у драматургії тыж політик Андрей Бродій (1895–1946) – еден из майвпливных політичных діятелів 20-40-х років ХХ столітя. А. Бродій народив ся 2 юлія 1895 рока у с. Кивяждь, днись Камяньское Иршавського раёна Закарпатської области у родині небідного селянина – заробника у США Ивана Бродія, што дав сыну добру просвіту. А.Бродій скончив Ужгородську грекокатолицьку учительську семінарію (1914), по

⁶ Інформації за премеры пьс начеряли сьме главно из прилогы «Репертуаръ драматическихъ школъ, ЗПНТеатра и УРНТеатра въ Ужгородѣ, 1934–1941» ; *позирай* выданя: Е. НЕДЗЪБЛЬСКІЙ. Угро-руський театр. – Ужгородъ, [1941]. – С. 101-102.

тому робив учителем у Великому Бычкові, пак був мобілізований на фронт, де дістав поранення. По війні спровбував себе новинарем, айбо доста скоро ся приключив до твореня новой партії – Подкарпатского земледельского союза (пак была переименована на Автономный земледельский союз).

А. Бродій опубліковав едноактову комедію про народну сцену «Спекулянты»⁷ (1932) ци, фактично, «Шпекулянты», бо написана песа по русинськы и лем назва песы, а тыж зазначкы у тексті, не знати чом, автор подає у російськым языку (видав, під впливом русофільських традицій). Окрем комедії, А. Бродій тыж написав куртый монолог «Первый поцьлуй»⁸ (1932). Веце ся ангажовати у літературі А. Бродію завадила політична активність. Выдтак він обстав в історії, видав, лем як автор одной песы⁹ и шора статей и рецензій у новинці «Русский Вѣстникъ»¹⁰, підписаных

⁷ БРОДИЙ Андрей И. Спекулянты: Комедія въ одномъ дѣйствіи: На одномъ изъ карпаторусскихъ нарѣчій. – Ужгородъ: Книгопечатня Юлія Фелдешія, 1932. – 32 с.

⁸ БРОДИЙ Андрей И. Первый поцьлуй: Монологъ для дѣвушекъ. – Ужгородъ: Книгопечатня Юлія Фелдешія, 1932. – 8 с.

⁹ Інформацію за ищи єдну драматичну штуку – песу «Гроши як диявол» (1922), гейбы написану А. Бродієм, нам ся уточнити не подарило. Тот вопрос треує додаточного изглядованя.

¹⁰ Веце інформацій за новинку позирай: ГАБОР В. *Українські часописи Ужгорода (1867–1944 рр.): Історико-бібліографічне дослідження*. Львів, 2003. – С. 299-309; МАГОЧІЙ П. Р. *Русский Вѣстникъ // Енциклопедія історії та культури карпатських русинів / укладачі П. Р. Магочій, І. Поп; заг. редакція: П. Р. Магочій, Ужгород, 2010. – С. 658-659.*

кріптонімами «аб» чи «а. б.». До того, за А. Бродія як писателя мало што писала критика – так тогочасна, як советська. Иншак повісти, забрала го Лета. Штука «Шпекуланти» про містних літературознателів и істориків культури днись тыж є даяков «terra incognita». Літературна и літературно-критична творчость А. Бродія ищи чекає на свого изглядователя.

На тот час А. Бродій як політик и искравый активіста політичной партії «Автономный земледѣльскій союз» (АЗС) сповняв важну функцію редактора ужгородського тыжднёвика «Русскій Вѣстникъ» (1924–1939) – офіціального органа той партії. Доста скоро (по смерти головы АЗС Ивана Куртяка) А. Бродій перебрав на себе повноваження головы той партії (1933–1944 рр.) и як ї лідер став депутатом Чехословацького парламента; за даякый час – тыж премер-міністром первого автономного уряда Підкарпатської Руси (1938).

Популярна в народі партія АЗС затирила ся сочасникам своєв активнов позицієв односно автономного статуса края у Чехословацьків державі. Сесь статус Підкарпатська Русь мала дістати нараз по тому, як ся зголосила у 1919 році на доброволнів основі стати частєв Чехословакії. Але и по пятнадцяти роках політичных дебатів чехословацька влада не мала даякы дати довгообчековану автономію, што гев-там оддрылєвало од Прагы підкарпатських політиків¹¹.

¹¹ Політичні візії лідерів АЗС А. Бродій доста ясно сформулёвав у статі в новинці «Русскій Вѣстникъ» од 3 апріля 1938 року; він писав: «Жаль, мы должны констатировать, что главное условие нашего присоединения – автономия Подк. Руси до сихъ поръ не осуществлена. Безъ осуществления автономіи здѣсь не можетъ быть ни политического, ни культурного, ни экономического развития».

Перманентный конфлікт АЗС из офіціалнов Прагов побуждав партіяшів-автономістів (многі из котрых ся хылили ид промадярській орієнтації) глядати підпору – хоть бы и у Будапешта. Нове політичне віяня – гет од Прагы! – совпало из ревізіоністськов політиков Будапешта вернути собі Підкарпатську Русь. Контакты АЗС из мадярськов владов, а mezi тым и фінансову поміч, котра приходила из Будапешта, чехословацька влада доста скоро роскрыла и уже у 1934 році росцінєвала політику АЗС як «вражу и деструктивну»¹². Сесе, mezi тым, не завадило А. Бродію, коли Чехословакія по Мюнхенськім договорі стала федеративнов державов, возглавити первый автономный уряд Підкарпатської Руси (11-26 октобра 1938 рока), хотяй по двох тыжднях чехословацька влада замістила го из довжности премер-міністра и дала до арешту гейбы за промадярське діятельство. (На пост премер-міністра влада, намісто А. Бродія, вийменовала Августина Волошина).

Туй ся напрошує вопрос: ци був А. Бродій агентом Будапешта, што підпоровав мадярській ревізіонізм? Видав, діло обстояло мало иншак: як політик-реаліст А. Бродій ся росчаровав у політичных перспективах Чехословакії завести на Підкарпатськів Руси автономію, рішити проблему словацько-русинської границі и объединити ушиткі русинські теріторії «од Попрада до Тисы». Межи тым, Мадярську державу у політичній атмосфері кінця 1930-х років він тримав за май реального играча на політичній шаховниці Европы. У ёго розуменю як політика и лідера регіональных автономістів автономный статус Підкарпатської Руси

¹² Цітуєме подля выдання: МАГОЧІЙ П. Р. Формування національної самосвідомості: Підкарпатська Русь (1848–1948). – Ужгород, 1994. – С. 131.

у складі Мадярської держави омного веце важив, чим неопре́дленість політичного статусу підкарпатського регіона у складі Чехословакії – державы хотяй демократичной, айбо – у реаліях надходячого німецького націзма – чим дале ілузорной.

Так ся и стало. Мадярщина (наперек Парижському мирному договору) 15 марта 1939 рока анексувала Підкарпатську Русь. Нараз по тому 17 марта 1939 рока мадярський премьер-міністер Пал Телекі на засіданю рады міністрів выголосив плани дати автономію наверненій теріторії¹³. Анексувана теріторія дістала назву «Карпатольйо терюлет» (мадярськ.: *Kárpátalja terület*), ци пак «Підкарпатська теріторія», авадь курто – «Підкарпатя». (Слово «Русь» из наименованя регіона мадярська власть преднамірено вышмарил).

Андрея Бродія нова-стара влада призначила (май 1939 рока) депутатом нижнєй палаты мадярського парламента, де під ёго веденєм група підкарпатських депутатів у 1939-1940 роках ся силовавала завести автономію. Друга світова война змішала політичні плани А. Бродія – Будапешт приставав на то, што из автономным статусом регіона мож ся буде вызначити лем по войні. Штоправда, Підкарпатській теріторії наперед був обіцяный статус будущей автономії під назвов *Kárpátaljai vajdaság* (Підкарпатське воеводство) из своїм 45-членным соймом (містным парламентом)¹⁴.

Межи тым, А. Бродій выдавав в Ужгороді новинку «Русская Правда» (1938–1940), пак її продо-

¹³ СПИВАК Б. І. Нариси історії революційної боротьби трудящих Закарпаття в 1930–1945 роках. – Львів: Видавництво Львівського університету, 1963. – С. 284-285.

¹⁴ Там же. – С. 286.

вження – «Русское Слово» (1940–1944), підпорувучи містну інтелігенцію главно русофілського направеня, хотяй офіціална влада помеже підкарпатські русины підпоровала (цалком обективно!) акурат русинофілську інтелігенцію. У 1944 році, коли стало ясно, же Мадярщина (як союзник націстської Німещины) у тів війні втратит анексовані території, включно Підкарпатську Русь, вопрос автономії одпав сам по собі. А. Бродій зачав наробляти новый план – не дати мадярській владі можность евакуовати углуб Мадярщины промысловый комплекс, обы не послабити регион. В августі 1944 рока він провбовав наязати контакт из советськыма партізанамы у Словацькім націоналінім восстаню, а тыж из партізанамы на Підкарпатю, але неуспішно...

Житя політика и писателя трагічно ся урвало у 1946 році – на зачатку анексії края Советськым Союзом. Політичні и соціалні трансформації из (мирного?) прикапчаня Підкарпатської Руси до советської Украины не дало бы ся вчинити без того, обы раз – превентивно – не вынищити фізично ци ізоловати політично ушитку еліту в обществі – державну и партійну номенклатуру, научну и творчеську інтелігенцію, а тыж священників грекокатолицької церкви и клас селян-середняків. Бо вни нияк бы ся не мирили из советськым режимом, што наязовав комуністичну ідеологію, єднопартійну політичну систему, колективізовав село и спровбовав наязати атеїзм.

Еліті судило ся стати первов жертвов надходячой советської анексії Підкарпатської Руси – туцеты містных політичных, церковных и общественных діятелів влада засудила на кару смерти, стовкы и тысячі невинных заслала до ГУЛАГів ци на Донбас, фабрикувучи їм обвіны.

25 новембра 1944 рока советська контррозвідка арештовала А. Бродія, а в маю 1946 рока в Ужгороді советы засудили го на смерть як зрадника, што колаборовав из врагом – мадярськов владов М. Гортія. Росстріляли А. Бродія в ужгородськів тюрмі у 1946 році, але не знати, коли того ся стало и де на ужгородськім Капушанськім цвынтарю уночи тайно го поховали. За єднов інформацієв росстріляли 11 юнія, за другов (посвідка из «загса Ужгородського міськвиконкома») – 7 децембра¹⁵. Лем по паді советського тоталітаризма нова украинська влада А. Бродія реабілітовала (27.12.1991) – подля Закона Украинської ССР «За реабілітацію жертв політичних репресій» од 17 апріля 1991 рока, як ся то пише у Законі по украинськы, «за відсутністью складу злочину».

Долю А. Бродія повторили и другі познаті політики Підкарпатської Руси. Межи ныма тыж премьер-міністер другого автономного уряда Підкарпатської Руси (1938–1939), а дале – президент невызнатой «єдноднёвой» державы Карпатська Украина (15.03.1939) священник и писатель Августин Волошин (1874–1945).

А. Волошин у 1930-і роки тыж спровбовав свої силы у драматургії и написав дакілко пес. Обадва політика стали жертвов окупаційного советського режіма: «фашістичного колаборанта» русофіла

¹⁵ Інформації за смерть А. Бродія дістали сьме прямо од ёго сына – умілця Андрея Бродія, што їх выходив по многих державных інстанціях, главно КГБ-СБУ и первый раз опубліковали сьме в енциклопедії; *позирай*: ПАВЛЕНКО Г. В. Діячі історії, науки і культури Закарпаття: Малий енциклопедичний словник. – Видання друге; за участі В. Падяка. – Ужгород, 1999. – С. 30-32.



Генеральна прокуратура ~~УРСР~~ України

ПРОКУРАТУРА

ЗАКАРПАТСЬКОЇ ОБЛАСТІ

27.12.91 № 13/12 35-89

м. Ужгород

м. Ужгород, вул. Ольбрахта, 21
кв. I

гр. Бродій А.А.

Довідка
про реабілітацію

Гр. Бродій Андрій Іванович, 1895 року народження, уродженець с. Ківяждь Іршавського округу Закарпатської області, до арешту проживав в м. Ужгороді Закарпатської області.

Засуджений 4-25 травня 1946 року за вироком судової колегії в кримінальних справах Закарпатського обласного суду за ст.ст. 54-4, 54-II КК УРСР до вищої міри покарання - розстрілу з конфіскацією майна.

Заарештований 25 листопада 1944 року.

На підставі ст. I Закону Української РСР "Про реабілітацію жертв політичних репресій на Україні" від 17.04. 1991 року гр. Бродій Андрій Іванович реабілітований.



Заступник прокурора області
радник юстиції

В.В.Химинець

Посвідка за реабілітацію А. Бродія од 27.12.1991 рока

А. Бродія подля рішення «советського суда» ліквідували в Ужгороді, а «буржуазного українського націоналіста» А. Волошина без суда замордовали у московськв Бутырськв тюрмі; и тыж не знати, де го поховали.

На довгі десятиліття на їх життя и творчість КГБ наклало табу. Советська ідеологічна машинерія гет ся постарала, обы так за Бродія, як Волошина мало што обстало в архівах и бібліотеках далшым генераціям

читателів и изглядователів. Што мож было понищити, то ся безбожно нищило. Ани їх літературна творчость у советські часы не была позволена. Лем послідну четвертину столітя изглядователі и читателі мавут таку можность.

Хотяй премер-міністры Підкарпатської Руси А. Бродій и А. Волошин были ідейні противники – русофіл и украинофіл – сесе уж обстало в історії, а сочасній Україні яло бы оддати честь каждому из них. Айбо неє то так! Украинська держава вшелияко інспірує (и фінансує) выученя житя и творчости, як то теперь узвычайно казати, «єдного из майвызначных борців за украинську націоналну ідею» – А. Волошина, днись – Героя Украины (2002, посмертно). Односно А. Бродія, нарубы, тота сама держава неучтиво провказує своє неприхылне одношеня до авторитетного лідера автономізма карпатських русинів. Выдтак, держава и дале пише свою історію фалошным чорнилом¹⁶.

Порівняня ідейно-естетичных концепцій А. Волошина и А. Бродія дає изглядователю можность видіти два пути (и можности) еволюції карпаторусинської народной інтелігенції. За обох авторів мож уповісти,

¹⁶ До днись влада не выказала інтереса ани провести ексгумацію тіла премер-міністра, ани компенсовати родині політика матеріалну и моралну шкоду. Веце за тоту пробему *позирай*: РАЗГУЛОВ В. Символ русинского единства // Християнська родина. – 1998. – № 13 (45). – С. 10, 14; «Я законотрухняний громадянин Угорщини, але я – русин», – заявляв в Угорському парламенті экс-прем'єр-міністр Підкарпатської Русі Андрій Бродій / Інтерв'ю з сином А. Бродія Андрієм Бродієм; записала І. Гармасій // Християнська родина. – 1999. – № 5 (60). – С. 12-13.

же общественне и політичне діяльність (про А. Волошина церковні діла тыж) не дозволило їм на повну міру изреалізувати свою творчу потенцію. А. Волошин був ци не послідный искравый представитель духовной інтелігенції. А. Бродій репрезентовав на Підкарпатю нову світську інтелігенцію. Про А. Волошина естетичні критерії літературного твора мали меншу ціну, чим будительські ідеї просвітенства. Доста часто у творах він ся простолінійно понижує до моралізаторства и поучительности ци й декларативного пропагованя христіанських ціннот. Як пишут изглядователі, його театралні штуки мож тримати лем за песы-мораліте¹⁷. У А. Бродія, нарубы, можеме видіти май глубокий аналіз общественногоявленя, за котре він пише. Автор означає проблематику у творі ци способ рішення проблеми через издрылёваня ідейных позицій дієвых особ. Індівідуалізованя характерів літературных героїв, їх языка, начеряні из реалногояжитя сужетні періпетії и реалістичне розрішення драматичногояконфлікта подносят драматургію А. Бродія до ліпших образчиків літературы критичногояреалізма на Підкарпатській Руси. Порівняня языка пес тыж підчеркує ідейні росохоженя карпаторусинської інтелігенції. А. Волошин, котрый на конєць 1910-х років ся изрік народницької орієнтації, хосновав у драматургії український язык и фонетичну орфографію. А. Бродій, як то мож видіти из комедії «Шпекуланты», хосновав про літературну творчість на зачатку 1930-х років карпаторусинську народну бесіду, котру знав, мож повісти, ідеално, хотья по смерти И. Куртяка партія АЗС (и Бродій тыж)

¹⁷ МИШАНИЧ О., ЧУЧКА П. Августин Волошин // Августин Волошин. Твори / Видання підготували О. Мишанич, П. Чучка. – Ужгород, 1995. – С. 32.

були прихильні скорі підпорovati русофілство, чим русинство.

Августин Волошин видав окремыми книжочками три театралні штуки: песу на три дії «Маруся Верховинка» (1931; під псевдо: Андрій Верховинський), песу на три дії «Без Бога ні до порога» (1936) и історичну драму на 4 дії «Фабіола» (1942). Довгі рокы обставала у рукопису и лем недавно (1995) была напечатана історична драма на чотири дії «Князь Лоборець: Послідній володар самостійної «Країни русинів» (Marchiae Ruthenorm)». До днесь обстає у рукопису діточа песа «Вечір святого отця Миколая», а рукопис песьы «Син Срібної Землі. Юрій Дожа» (написана у Празі на зачатку 1940-х років) десь ся стратив. Вцілови, драматику А. Волошину так ся й не подарило вийти зе черту релігійного моралізаторства и христіанської догматики, а придумані ним драматичні сужеты мало што мали до реального житя під Карпатами. Видав, зато монографічне изгядованя історії драматургії «Закарпатської України» од єдного з ліпших знателів театралного житя на Підкарпатській Русі Ю. Шерегія¹⁸ лем подаґде у текстї, и то доста скупо, пригадує на драматичні твори А. Волошина. Выдтак, доста чудно, же теперішні українські изгядователі творчости А. Волошина силувут ся перевершити Ю. Шерегія и доказати, же твори А. Волошина «мали бы убыяти достойне місто в історії закарпатської літературы»¹⁹.

За майліпший твір А. Волошина можеме три-

¹⁸ ШЕРЕГІЙ Ю. Нарис історії українських театрів Закарпатської України до 1945 року. – Нью-Йорк – Париж – Сідней – Торонто – Пряшів – Львів, 1993. – 414 с.

¹⁹ РЕБРИК Н. Письменницька спадщина Августина Волошина // Дукля. – Пряшів. – 2014. – № 4. – С. 61.

мати «народну песу» «Отче наш». Є то на днесь абсолютно неизвістна театрална штука драматика. Не так давно однашли сьме ї рукопис у бібліотеці семінарії Піттсбургської митрополії Американської грекокатолицької руської візантійської церкви (Byzantine Catholic Metropolitan Archdiocese, Pittsburg, PA) у Піттсбургу. Як ся там дістала – у бібліотекарів ніякої інформації неє. У будучности мы плануєме песу «Отче наш» выдати в Ужгороді, обы общественность мала можность ліпше зознати творчость А. Волошина. Туї ниже даме лем курту характеристику той песы.

Песа на три дії «Отче наш» написана в Ужгороді у 1933 році. На титулі песы автор застачив текст: «В значній переробці за Й. Раутером». Автор напечатав текст песы на печатній машинці. На титулі свое прозвище А. Волошин не застачив. Хотяй рукопис анонімный, легко дає ся атрибутовати ёго авторство. Ідейный напрям песы, ідея морального выліпшеня героїв, антикомуністична риторика, релігійна тематика, христіанське моралізаторство, язык штуки – ушитко доказує правильность нашого предположеня.

Спасає песу детективный сюжет, годно быти, позыченный у даякого Й. Раутера. Панський слуга Флоріян хоче ити до Америки. Але про істоту потребує гроші, жебы за океаном зачати свій бізнес. Флоріян пограбовав и забив свого пана Златоша. Обы замести слід, придумав хытромудрый план. Безработный Войтех Ремеш надіяв ся на матеріалну поміч од пана Златоша, зато (за порадов Флоріяна) пішов до нёго домів. Слідами Войтеха такой нараз прийшла поліція. У злодійство миролюбного христіана Войтеха тяжко повіровати, кебы не ніж, котрым забито Златоша. (Ніж выкрав у домі Ремешів Флоріян и підкинув Войтеху). Суд засудив Ремеша на смерть. До тюрмы попроцати ся из

Войтехом прийшли священник, жона и дочка Войтеха, робочі из фабрики и... злодій Флоріян. Посліднов волѣв Войтеха было помолитись ведно из дочков Розарієв, як сесе отець каждоденно робив у свому житю. И туй ся стало чудо... Слова молитвы (*... и остави нам долги наша, яко і ми оставляем должником нашим...*) пропалили усвідоменя Флоріяна и він ся признав у злодійстві. Щира молитва, подля авторського замысла, спасла життя Войтеху. Межи тым, роз'язка драматичного конфлікта у тюремній цімрі виявилась яковсь вялов и малоправдоподобнов:

Флоріян : (падає перед Ремешом навколішки)
Войтеху, на колінках стоїть перед тобою великий злочинець і просить за одпущення. Много ти через мене перетерпів, – прошу тебе, чи можеш мені відпустити...

Войтех : Прошу Господа Бога, щоби до тебе був милостивий.

Флоріян : Тепер радо вмру, тільки як би Бог одпустив мені... Дозвольте, щоби мала Розарія перед цим помолилася, як з батьком: Отче наш... Її молитва звучати буде, як з ангельських уст...

Войтех : З серця дозволяю. І най отець небесний буде тобі милостивим суддею, як був Він моїм охоронцем через святу молитву – «Отче наш».

Як видиме, А. Волошин в історії умелецької літератури Підкарпатської Русі обстав доста посереднім драматиком.

Песу «Шпекуланти» Андрей Бродій написав десь під кінець 1930-го чи на зачатку 1931 рока. Первий раз опублікувати ї він дав до своєї новинки «Рускій Вѣстникъ», котру редіґовав. Штуку напечатали на продовження у дакілько числах за 1931–1932 роки²⁰. Лем по тому вийшла книжна верзія той штуки – в ужгородськїм видавательствї Юлія Фелдешія – у 1932 році. Автор подойняв актуалну на тот час проблему бідованя підкарпаторусинського села, искрыто апелюючи до чехословацької влады. За інспірацієв не мусай было ходити далеко; був то час, коли по русинських селах у всів «красі» дала за ся знати світова господарська криза (1929–1933), што принесла про десятки ци й стовкы тысяч містных жителів безроботя и жебрацтво.

У репертоарі аматерських (селських) театрів на Підкарпатю доміновали тогды малі драматичні форми. Акурат едноактова песа всеціло одповідала професійному уровню любительських труп. (Професійного театра, обы міг играти великоформатні драматичні штуки, на тот час на Підкарпатській Руси ищи не было). А. Бродій ся орієнтовав на аматерський театр, коли плановав писати свою «комедію въ одномъ дѣйствіи». И тыж ся орієнтовав на підкарпатське село – ёго зрителів, про котрых путичка у широкий світ ишла лем через русинську народну бесіду, и тота бесіда про просту челядь значила омного веце, чим чужі так російський, як український языки. На титулі книжки

²⁰ Нам ся не подарило однайти числа из песов «Спекулянты». Туй ся покличеме на бібліографію новинки «Рускій Вѣстникъ», *позирай*: ГАБОР В. Українські часописи Ужгорода (1867–1944 рр.): Історико-бібліографічне дослідження. Львів, 2003. – С. 306.

«Шпекулантів» автор пєсы зазначив, же написана вона «на одномъ изъ карпаторусскихъ нарѣчій».

Межи тым, підкарпаторусинське общество уж было росколотою наязанов емігрантами «языковов борьбов». Як писав у сєсь час чєськый літературознатель и автор історії підкарпаторусинської літературы (1930) Антонін Гартл, «языкові спору приводят до національного роздвоєваня (кидь не до ростоєваня) підкарпаторуського народа...»²¹. По селах містна інтелігенція капчала ся до:

- а) русофілського Общества им. А. Духновича (поуживали російський язык авадь так называний підкарпатський традиційний язык, котрый екзистовав у многих варіаціях и був амалгамов карпаторусинських діалектів, церковнославянського, російського языків и мадяризмів);
- б) до українофілського Товариства «Просвіта» (поуживали раз український (руський) язык подля компромісної «Граматики руського языка» Ивана Панькевича, а дале перейшли на український літературний язык).

Ясною діло, підкарпатські драматики, котрі й самі были частєв той языковой борьбы, лишили по собі гет много творів, написаных підкарпатським традиційним языком, ци по російськы, ци українськов (руськов) «компроміснєв» граматиков, ци українськым літературным языком²².

²¹ ГАРТЛЬ А. За національное будущее Подк. русинов // Живая мысль: Карпаторусский журнал политики и культуры. – Прага. – 1934. – № 5. – С. 13.

²² На конець 1930 рока, приміром, на Підкарпатській Русі діяли 143 аматерські театралні кружки Общества им. А. Духновича и 38 кружків Товариства «Просвіта». Веце інформаций за театралне двиганя, *позирай*:

Была и третья (менша) група літераторів, што ся тримала народницької орієнтації и писала народным русинським языком. Сеся, послідна, група сімволізовала собов корінный русинський народ у Карпатах, што хоче вытворити свою культуру и літературу в народнім языку. Так русофілы, як украинофілы критиковали русинську народну інтелігенцію – за народный язык. Як писав молодой містный інтелектуал-украинофіл Иван Горват, што сповідовав ідеї російсько-українського компроміса на Підкарпатю, «...треба говорити про спільного «ворога» обох напрямків, про т. зв. русинство, яке оба табори уважають чомусь чехофільським (?) та разом його бють... Чим же «русинство» страшне? Оба табори уважають його своїм конкурентом, як третій культурный напрям»²³.

Межи тым, на зачатку 1930-х років у підкарпаторусинських інтелігентських групах ся розспрудила діскусія за національне єдинство підкарпатських русинів и роль материнського (народного) языка. (За слоган той діскусії тримали фразу «Назад до народа!»). Розбурькав діскусію русофіл Иван Андрашко, редактор пражського журналу про підкарпаторусинів «Живая мысль», своєв статєв «Не разбивайте народа»²⁴. Євменій

ПАДЯК В. Історія карпаторусинського національного театра и драматургії: Высокошкольський учебник. – Пряшів: Выдавательство Пряшівського універзітета, 2018. – С. 148-153.

²³ ГОРВАТ І. Чи погодимося? // Живая мысль: Карпаторусский журнал политики и культуры. – Прага. –1934. – № 5. – С. 6-7.

²⁴ АНДРАШКО И. Не разбивайте народа // Живая мысль: Карпаторусский журнал политики и культуры. – Прага. –1934. – № 4. – С. 15.

Сабов у тів діскусії підчерковав: «Не мож ся одрїкати од свого материнського языка...» и додавав: «...кидь будеме говорити на свому языку, хоснувучи свій выговор, выд-так будеме говорити правильно по-русскы. И нарубы, кидь ся имити приспособляти язык до великорусского выговора, покажме язык, айбо николи го не изробиме великорусским»²⁵ (підчерк наш – В. П). Чех Антонін Гартл, што провбовав выдержовати на Підкарпатській Руси невтралность, у тів діскусії позитивно оцінёвав діятельство Августина Штефана, котрый закликав (у 1929 році) до національного єдиненя. Чеськый літературознатель тыж високо оцінив діятельство А. Бродія, котрый, не аж так давно «проголошовав ... наверненя ид карпаторусскости» и котрый «набізувно є зоркым наблюдателём національного развиваня»²⁶.

И хотяй радїкалы, як русофілы, так украинофілы, одвергли хотьякі ідеї той діскусії²⁷, видав, акурат у

²⁵ Сесї слова Є. Сабова (по ёго смерти) пригадав у своїв статї И. Андрашко, выдкы їх береме; *позирай*: АНДРАШКО И. о. Евменій Ив. Сабов // Живая мысль: Карпаторусскій журнал политики и культуры. – Прага. –1934. – № 5. – С. 2; – Андрашкова статя написана по російськы, выдтак и слова Є. Сабова він подає у російськым языку; *цитуєме* в оригіналі: «Не нужно отказываться от своего материнского языка, <...> если мы будем говорить на своем языкѣ, своим произношением, тогда мы будем говорить правильно по-русски. И наоборот, если станем приспособлявать его к великорусскому произношению, то мы испортим язык, но никогда не сдѣлаем его великорусским».

²⁶ ГАРТЛЬ А. За національное будущее Подк. русинов // Живая мысль: Карпаторусскій журнал политики и культуры. – Прага. –1934. – № 5. – С. 13.

²⁷ Веце за діскусію *позирай*: МАГОЧІЙ П. Р. Формування національної самосвідомості... – С. 109, 231.

контексті той ідеї («навернення ид карпаторусскости») А. Бродій испробовав написати драматичный твір «Шпекуланты» – «на одномъ изъ карпаторусскихъ нарѣчій», то значит по русинськы.

Треба вызнати, што у сесь час по русинськы писати уж ставало даяков нормов – айбо лем мимо теріторії Підкарпатської Руси. Было то так у США, де часть інтелігенції підкарпаторусинської діаспори перейшла на народну бесіду, приміром, Емілій Кубек, Валентин Горзо, Стефан Варзалій, Георгій Гуланич, Джордж Теґзе (Юріон) и др. Было то так тыж у русинів-лемків – так в еміґрації, як дома, приміром, Григорій Гануляк, Аскольдович (псевдонім), Иван Русинко, Димитрій Вислоцькый (Ваньо Гунянка), браты Стефан и Петро Телепы, Ніколай Цисляк, Иван Похна, Параска Спяк, Стефан Кичура и многі другі. Яло бы у тім контексті наганути ищи Гавриїла Костелника у русинів Воеводини ци, приміром, Антонія Годинку у Будапешті...

Видав, свій експерімент из русинськов бесідов про літературну творчость А. Бродій признав за не аж так успішний и навхтема перейшов на основы русофілства и російського языка. Межи тым, акурат по «Шпекулантах» на Підкарпатській Руси ся провказала група писателів русинофілського направеня. Кидь говорити локално лем за драматургію, можеме туй означити ряд драматиків, чії твори были написані по русинськы. Иде за песьы «Полюбивъ паничъ селянку» (1935), «Буря надъ хатою» (1937) и «Тиса тече» (1941) од Еміліана Калабішкы; «Тарасович» (1936) и «Тестамент» (1936) од Ивана Муранія; «Надъ Юрою Коржомъ псалтырь читають» (1934) и «Канцелярская сила» (1935) од Фомы С. Легуна; «Овчарь» (1940) од Михайла Лугоша и Владимира Грабаря и другі. Помеже песьы пряшівських літераторів были то «Вѣдьма-Босорка» (1933), «Боль-

ная» (1934) и «Так то было» (1950, США) од Ивана Новака; «Присташъ» (1935), «Сельскій судъ» (1937) и «Свадьбой начинается и свадьбой кончится» (1937) од Ёсифа Кизака и др.

Кидь говорити за сімпатії зрителів, їм ся любили пєсы тых драматиків, хто ся одкликовав на потреби культурного житя и тогочасні проблемы общества. Дїйство у сяких пєсах майже усе перебігає у природному русинському окруженю, а в основу драматичного конфлікта майже усе ся кладе актуална на тот час легка соціална проблематика, означена лем схематично. Драматичный конфлікт перебігає без даякой трагедійности ци й жертвенности из боку героїв. Містні драматы той эпохы усе ся клонят до мелодраматизма, без даяких амбіцій подойняти глобалні світові проблемы ци й глубоко ся занурити у психологію своїх героїв авадь указати даякі переломні моменты історії свого народа. Даколи выпозірує й так, же иде за єдну нескончаему «народну пєсу» у многих житевых варіаціях. На означеня сяких творів хосновали дакілко назв, як то «весела гра», «народна пєса», «селська гра», «селська комедія», «весела сцена», «селська історія» и т. д.

Феномен популярності помеже підкарпатське обывательство комедійного жанра, пересыпаного співанков, куплетами, музиков, танцями, легко ся потовмачує природнов духовностєв тогочасного карпаторусинського села, котре жило народнов співанков, народными танцями, народными обрядами.

Сесь інтерес общества до «свого» (орігінального) репертоара доста скоро учув писатель и драматик Антоній Бобулський, котрый як первый из містных авторів зачав писати легкі водевілі и комедії, як то

«Уйко из Америки» (1922), «Чи доллары?» (1925), але главно – «Нѣмая невѣста» (два виданя: 1926, 1932). Ведно из А. Бобулськым русинські народні характери на сцені указав Сіон Сілвай. Як драматик він добрі ся зятимив зрителям своєв мелодрамов «Маруся» (1930). Жанр комедії, водевіла ци легкой мелодрамы и надале обставав жаданым про зрителя. Выдтак у 1930-ті роки провказали себе у комедійнім жанрі И. Новак («Большая», 1934), И. Мураній («Тестамент», 1936), Ё. Кизак («Свадьбой начинается и свадьбой кончится», 1937), А. Сливка («Бородате непорозумѣня», 1938) и другі.

На розділ од других авторів комедійного жанра, А. Бродій свою сатиричну соціално-бытову комедію «Шпекулянты» віновав проблемі тяжкого економічного житя на Підкарпатській Руси и вшелиякым негативным рецїдівам, што ся до того яжут – шпекуляція, шефтарство, краденя, чалованя, гунцутство и т. д. Люде выживали, хто на што быв годен. То быв час, коли шефтарям ся выплатив шмугель (то значит, контрабанда) из до(в)ганом. Туй бы мож, хоть лем єдным шориком, приганути тему контрабанды ци май конкретно – шефтованя из довганом (и паленков) в умелецькій літературі. Од doby гоголевського Чічікова из «Мертвых душ» тотя проблема не перестає быти актуалнов до днесь. Так ци иншак найдеме ї тыж у карпаторусинськів літературі – у песі Александра Духновича «Головний тарабанщик» (1852, образ шпекуланта Празноглавського), оповідці Анатолія Кралицького «Житейскія дрязги: Возня с запрещенным табаком» (1893), оповіданю Ивана Муранія «Купованя мелаю в 1919-ом г.» (1941) и других творах.

Подля сужета комедії «Шпекулянты», селський шефтарь єврей Лейб десь роздобыв мадярського

пахнячого довгана. Обы обыйти «фінанцы» (данёвый уряд), Лейб(а) дав го сховати до мало нечистого на руку сосіда-русина Ивана. Айбо Лейбу выслідили два русины-аферісты, котрі ся чинят чеськыма «фінанчными інспекторами» и про істоту бесідувут из гандлярями по чеськы. У хыжы Ивана перепуженый Лейб провбує даяк ся одкупити од «фінанців». Стокмив ся из нима за пятьсто корун. Коли переведіти злодії из грішми пішли гет, Лейбу навщивили справдішні інспекторы из фінансового уряда. Лейб порозумів, же го «здоіли» злодії. (Чисто по гоголевськы – позирай «Ревізор»!)

Автор провказує соціалні проблемы села – не оправдувучи, айбо ходем обьяснявучи вчинкы своїх героїв, што ся пуцавут до краденя, гунцутства и шефтарьства. Ёго герої – прості люде. У иншакому житю вни были бы цалком иншакі, кидь бы не бідованя. И не став бы ся из нима тот трафунок, што ся мало не скончив покутов. На сцені видиме тіпову русинську родину – порядочну, богобойну, роботливу и усиловну. Муж (Иван), Жена (безименна) и їх дітвак Цилё (курта прозывка од мена Висиль) суть обычайні селяне – почтиві, щиросердні, розсудливі, непиякы и добрі сосіды. Живут бідно, мож уповісти – из дня на день. Живут своїм розміреним селськым житям. Межи тым, у стайні уж не мавут ани теляти, ани коровы. Обы было чим палити, не так давно уночи вни покрали попівські дрыва.

Иван цалком не здальй до шефтарьства челядник, айбо коли раз вночи из двома міхами «мадярського» (контрабандного) довгану до хыж ся ввалив їхній сосід Лейб(а), Иван по сосідськы не годен був одказати Лейбови; видав, и даяка копійчина у газдівстві бы ся придала (туй и дале текст даєме в авторськів орфографії – автор не хоснує літеры «є» и «ґ»):

Мужь : Уткѣ ты тото добывѣ?

Лейбь : Чоловѣче, не звѣдай ничѣ ай дагде запхай на два, на три дны, бо знаешь, што чортъ не спить, а за сякимъ каждый нюхатъ.

Мужь : Чоловѣче божый, а кѣдъ тото у мене найдуть?

Жена : Ой Лийбо, изъ того ищи годна бѣда быти.

Лейбь : Яка бѣда? Што за бѣда? Найдуть, та найдуть. Та возмутъ. Та моя бѣда, ни ваша!..

Жена : Айно...!? А кару пакъ тко буде платити?

Мужь : Ты ся жоно въ тото немѣшай. <...> Я не збаву. Лишь знаешь, ажъ найдуть, та я наразъ уповѣмъ, што довганъ е твуй.

Лейбь : Не найдуть, не найдуть. Што говоришь дурницу? Ба тко бы издурѣвъ у тебе довганъ глядати? (Развяжетъ мѣшокъ и вытянетъ узель листковъ): На, та порѣжь собѣ. Сякогось ищи и такъ ни куривъ.

Мужь : Ой нѣтъ. Я ажъ отложу, та якъ сусѣдови, спрячу ти 'го задарь.

Лейбь : Иванку, я дуже ти красно дякую, но знаешь, што я тото не хочу. Ай пакъ обрахуемься...

Автор у сатиричних комедіях доста реліфно пропи- сав характери своїх героїв. Лейб – то газардний шеф- тарь, націлений на гроші – купити тунє и перепустити дорого. Він тьж майстер истокмити ся из фінансовов поліцієв и дати одкуп, обы минути кару. Двоиця русинів-ложноінспекторів (I. гость и II. гость) – то опытни, выбити махлярі. Се професіоналы своего діла, што добрі знавут як пререяти жертву: вни взяли на ся панської платя, ходят из ташками у руках. Наподобню- вучи исправдушных чеських фінансовых урядників,

на людях злодії говорять лем по чеськы. Штоправда, гев-там вставляють русинської авадь малярської слово (прозражують себе!), лем же настрашені герої на тото ся не творят.

Майбілшым одкрытям драматика А. Бродія став образ девятьрочного дїтвака. Цилё, як глубоко очертав го автор, – се любопытливый дїтвак, што позирає на світ широко отвореныма очима. Се жива натура, верткый як веретено, всягде ся пхає, ушитко хоче видіти и чути, зато усе ся знає запхати до бесїды старшых – и тото доста часто стає у песі жерелом комічного ефекта. На зачатку дїї – у заязці песы – видиме, як Цилё своїм діточым розумом глядає отвіт на вопрос: Як стати богачом? Перву ошколу, так бы мож уповісти, «теоретичной науку» за способ стати богатым Цилё дістає од своїх родичів:

Сынъ : Но, – а пакъ я чувъ, што Ковнеръ не бывъ усе баровомъ [бароном – В. П.]. Та ажъ вунъ мугъ ся стати такимъ великимъ баровомъ, та пакъ я чому бымъ не годень быти князьомъ? Та нѣтъ?

Мужъ : Майже.

Сынъ : Што майже?

Мужъ : Майже, што нѣтъ?

Сынъ : Нѣтъ...

Мужъ : Бо Ковнеръ, хлопе, передъ тымъ бывъ богатымъ Ковномъ, а ты и перед тымъ и за тымъ будешь неборакомъ, бѣднымъ рушнякомъ.

Сынъ : Оо-ва, тото не буде. Я няньку буду богатымъ. Зароблю много и много гроши и буду дуже богатымъ.

Жена : Будешь богатымъ якъ Лонякъ. И Лонякъ робить калѣка каждый день до слѣпоты.

Мужъ : Майже. Ажъ ты изъ роботы хочешь убогатѣти.

Жена : Но, не сучи уже тулько, ай иди геть спати и ты.

Сынъ : Такъ пакъ якъ можъ иншакъ статися богачомъ няньку?

Мужъ : (встаєть и роботу отложить) Як? Такъ якъ Ковнъ и другъ Ковны: шпекуланствомъ.

Жена : (къ Сыну) Но иди спати, иди (отведеть его къ печи).

Сынъ : Я мамко бывъ бымъ добрымъ шпекулантом.

Жена : Тать я вижу, што ты великий шпекулантъ... (Стѣгаєть изъ него платя).

Сынъ : Айно. И панъ учитель ни разъ ми уже казали, што я великий шпекулантъ... (вылезетъ на пѣчь и ложится спать).

Акурат трафунок из довганом у хыжі Ивана, свідителѣм чого быв малый Цилѣ, став про нѣго образнов практиков ци, мож уповѣсти, – первым експліцитным образчиком. Каждый герой дашто додає до ёго розуменя богатства и способа, як го досягти. Шефтаръ Лейб лакомит го пахнячым довганом (символ легкого заработка), из котрого мож скрутити добрі сіворы... Ложні «финансові инспекторы» тихонько ся потішавут из того, же Цилѣ, видав, тыж стане, як вни, инспектором, лем же має ся научити «як треба здоѣти біка». Нянѣ конецъ пєсы выясняє собі и сынові, же «инспекторы» – то «якѣсь махляники... шпепкуланты». А мати учит сына, як мож распознати шпекуланта:

Сынъ : А пакъ уткѣ они знали, што Лийба въ хлѣвѣ съ довганомъ?

Жена : Та ци чортъ ѣхъ знае? Ткось ѣмъ доповѣвъ.

Сынъ : Вшитко знали. Тото были вилікѣ мудрякы. Розумні люде, шпекуланты.

Жена : Тото паны, ни люде. Кулькомъ ти уже разказала, што тко въ довгыхъ нагавицяхъ ходит, то жидъ або панъ, – а ни чоловѣкъ.

Цилѣ, напозиравшийся той драматичной комедіи, коли Лейба, як быка, «издоили» майхытромудрі шпекуланты, своїм ищи діточым розумом умствуе: «Чоловѣкъ обогатѣти лишъ шпекуланствомъ може...».

Комедія має гейбы два планы. Нижній – то перебіг сужета. Вышній – то філософської роздумованя дієвых особ – простых селян – за своє житя и будучность. Автор (подля закона жанра) од себе туй нич не додае. Правду житя прояснявут самі герої, што ся силувут варовати од світа злодіів. Издрилѣваня житєвых позицій дієвых особ лем ускорюе тоты процеси. Як бы ся там не скончила сужетна лінія про Лейба – ци не аж так зле, ци, нарубы, цалком зле, – в основі то нич не міняе, докудь ся не помінявут соціално-економічні пудмінкы житя. Бо Лейб израна изась ся возьме собі дашто вышпекуловати, а ложні фінансы изась найдут си «жертву», обы ї «издоїти»... «Панство» буде жити своїм житєм, чалувськым, а люде – своїм, жебрацькым.

А Иван назад буде мати клопоты... Бо пудмінкы житя суть, гейбы тяжкый засуд: «Изъ роботы» «и передь тымъ и за тымъ будешъ неборакомъ, бѣднымъ рушнякомъ»!

Комедія «Шпекуланты» сатирично провказуе реаліи карпаторусинського села часу депресіи 1930-х років. А. Бродій высміяв вічну проблему людського

общества – жадность за богатством. Комедія написана живо, из знатям проблемы; ї мож зачислити до ліпших едноактовых театралных штук на Підкарпатській Руси 1930-х років.

Проблема, котру подойняв автор, актуална и днесь, а пороки (контрабанда из довганом и паленков, шефтарьство, шпекуляція, чалованя) каждоденно мож видіти у нашому «капіталістичному» обществі. Сесе робит песу актуалнов ай днись. Не чудно буде, кидь завтра-позавтра якісь аматерські кружки ци й професійні театры заграют ї на сцені. И буде се достойный вінець на могылу Андрея Бродія – зоркого наблюдателя національного развиваня підкарпатських русинів.

Валерій Падяк, к. ф. н.